

陶雲汀先生奏疏

奏摺卷二十二目錄

撫蘇稿

安化陶 澍

暫借局銀平易市價摺子

淮海積歉地方應徵錢糧分別展緩摺子

總督會稿

附奏挈獲積盜請加鼓勵摺片

蘇省派辦布疋逾額懇請酌減摺子

恭謝

御賞藥錠摺子

奏報三次清查案內追補銀數並逾限未完摺

子

審明控爭灘地歸營並另行查辦召變新淤摺子

請酌減各州縣提解羨餘彌補舊虧銀兩摺子  
奏報監臨閘務起程摺子

附奏淮揚河湖盛漲摺片

附奏陳請

陛見摺片

新漲沙洲酌議入官充公以杜爭競摺子

暫借局銀平易市價摺子

奏爲蘇城銀價昂貴暫借銅鉛工本易換錢文以  
平市價專摺陳明仰祈

聖鑒事據蘇州布政使梁章鉅署江蘇按察使潘恭  
常會詳轉據署蘇州府知府李景嶧等稟稱蘇  
城爲百貨聚集之區銀錢交易全藉商賈流通  
向來山東山西河南陝甘等處每年來蘇置貨  
約可到銀數百萬兩與市廛錢價相平商民稱  
便近年各省商貨未能流通來者日少銀價增  
長然每銀一兩亦不過值錢一千一百六七十

文至二百餘文不等自上年秋冬至今各省商賈俱係滙票往來並無現銀運到因此銀價頓長錢價愈賤竟至每銀一兩易制錢一千二百八九十文至三百餘文不等且銀數稍多卽不能尅期換集現值

奏銷及上忙喫緊之時民間以米易錢又以錢易銀完納新賦其價值較之往日多寡懸殊情形拮据催徵更難踴躍以課賦最多之地值銀兩短缺之時完解殊爲棘手是銀價過昂不但民商俱病實有關於

國計不得不亟爲籌畫伏思寶蘇局鼓鑄錢文每錢一千需用工本銀九錢一分三厘六毫及搭放兵餉則以制錢一千抵銀一兩今錢賤銀貴似不宜以至貴之工本再行鼓鑄且查錢局現存制錢六萬餘千卽暫緩開卯亦不慮制錢之支絀請將寶蘇局應行補鑄道光七年分五卯錢文暫停鼓鑄卽于司庫撥存本年銅鉛工本項下暫借銀二十萬兩發換制錢收局存貯以平銀價俟銀價平定仍將原錢陸續易銀還款不致虧折等情飭據寶蘇局監督同知范博文

查覆亦稱撥借銅鉛工本換錢藉平銀價於民商實有裨益於局務並無窒礙由司核詳請

奏前來 臣查市肆銀錢價值必須貴賤適中方於民商兩便今蘇城銀價過昂錢價過賤農民易銀完賦倍形拮据各州縣催徵不易溯查乾隆年間屢因錢價昂貴動撥局錢易銀平價有案今因銀貴發銀收錢以平市價事勢相同查司庫現存錢價銀二十四萬餘兩堪以借撥銀二十萬兩卽由蘇州府督同長元吳三縣陸續具領發換制錢解局收貯一俟銀價平減卽由該

府等領錢易銀解還司庫歸款仍隨時察看如  
借撥銀兩尙未發完而銀價已經平減卽行停  
止發換其易換銀錢責成該府縣親加查察毋  
任錢牙經紀人等抑勒擾累再查寶蘇局庫現  
存餉錢六萬餘串核計搭放通省兵餉尙可放  
至九月底止所有未鑄道光七年五卯錢文現  
值洋銅不敷配用且當錢多價賤之際應請暫  
行停爐以免徒滋陳積久懸成本其所借銀兩  
已據藩司卽飭該府縣具領陸續放給俾銀價  
迅就平減所有暫借局銀平易市價緣由謹會



同大學士兩江總督

臣

蔣攸銛合詞恭摺具

奏伏乞

皇上聖鑒謹

奏

道光八年四月初八日具

奏五月十一日奉到

硃批另有旨欽此又同日奉到道光八年四月二十

四日內閣奉

上諭陶澍奏蘇州銀價昂貴暫借銅鉛工本銀兩發  
換制錢以平市價一摺蘇州省城因近年商貨未

能流通又多滙票往來銀價頓增現值上忙開徵  
民間易銀納賦較之往時多寡懸殊商民均多未  
便自係實在情形着准其於司庫現存錢價銀內  
借撥銀二十萬兩由蘇州府督同長元吳三縣陸  
續具領發換制錢解局收貯一俟銀價平減仍飭  
該府等易銀解還司庫歸款如借撥之項尙未發  
完而銀價已經平減卽行停止發換該撫卽責成  
該府縣認真查察勿任牙行經紀等抑勒擾累據  
奏寶蘇局庫現存餉錢六萬餘串尙敷數月搭放  
兵餉之用所有未鑄道光七年五卯錢文亦准其

淮海積歉地方應徵錢糧分別展緩摺子

總督會稿

奏爲淮海等屬積歉地方熟田應徵錢糧因麥苗凍損民力維艱仰懇

聖恩分別展緩以廣

皇仁事竊照江淮各屬上元等州縣衛道光七年夏

秋雨水過多低田積水收成歉薄業經臣等將

歉收田地應徵新舊錢糧並各屬熟田應徵舊欠錢糧先後

奏奉

恩旨分別緩徵欽遵辦理在案各屬閭閻感頌

皇仁實已無微不至惟淮海等處地近大河南北專望麥收接濟續據海州知州許乃大詳稱州境東南鄉及西南白塔埠南榴興穀房山四東半鎮因上年臘底雪澤過多沍寒疑結麥苗有損今春雪水停積補種又復失時請將應徵道光六七年兩年漕價緩至本年秋成後啟徵又據清河縣知縣陳潞詳稱縣境吳三四圖之王家莊金城永豐新興等鎮上年冬後雨雪月餘凝凍日久麥苗受傷請將各該鎮應徵道光八年上忙新賦及道光七年未完熟田錢糧漕價一併

緩至本年秋後啟徵又據沭陽縣知縣譚炳光  
詳稱縣境去臘連次大雪天寒冰凍今春消化  
後多有積水未能乘時種麥卽隨後趕種者時  
候已遲請將帶徵嘉慶二十三四年地漕及  
漕價河租等款緩至本年秋後徵收又據署阜  
寧縣知縣安貞吉詳稱上冬雪澤較多低窪處  
所凍結一二尺餘驟難融化迨交春凍解雪消  
泥土濕爛以致未種者難以佈種已種者亦多  
受損出土較遲請將道光六年被災較重上年  
雖屬有秋現在二麥難期豐稔之西北西南二

鄉各圖里應徵七年未完秋成併徵地漕河工銀兩及七年墊辦漕價緩至本年秋後徵解各等情當飭藩司確查實在情形詳辦去後今據江寧布政使賀長齡查明均係實在情形詳請具

奏前來臣等覆加體察海州清河沐陽阜寧等四州縣本係積歉之區上年雖屬有收元氣究未盡復今因年前雨雪較多冰凍日久或種麥較遲或受凍過久不能暢發係屬實在情形當此青黃不接之際若將新舊錢糧按忙啟徵民力

實有未逮合無仰懇

皇上天恩俯准將海州東南鄉及西南白塔埠南榴  
興穀房山四東半等鎮應徵道光六七兩年漕  
價清河縣吳三四圖金城永豐新興五鎮應徵  
道光八年上忙新賦併道光七年未完地漕及  
漕價沐陽縣應徵嘉慶二十三四年地漕及  
漕價河租等款阜寧縣道光六年被災較重之  
西北西南二鄉各圖里應徵七年未完秋成併  
徵地漕河工銀兩及七年採辦漕價均緩至本  
年秋後啟徵以紓民力感戴

聖恩益無紀極臣等謹合詞恭摺具

奏伏乞

皇上聖鑒謹

奏

道光八年四月初八日具

奏五月十一日奉到

硃批另有旨欽此又同日奉到道光八年四月二十  
四日內閣奉

上諭蔣攸銛等奏淮海等屬積歉地方麥苗凍損懇  
將應徵錢糧分別展緩一摺江蘇海州清河沐陽



阜寧等州縣經該督等查明本係積歉之區上年因膈雪過多沍寒凝凍或種麥較遲或受凍過久不能暢發現屆青黃不接之際若將新舊錢糧按忙啟徵民力實有未逮着照所請加恩將海州東南鄉及西南白塔埠南榴興穀房山四東半等鎮應徵道光六七兩年漕價清河縣吳三四圖金城永豐新興五鎮應徵道光八年上忙新賦并道光七年未完地漕及漕價沐陽縣應徵嘉慶二十三四五年地漕及漕價河租等款阜寧縣道光六年被災較重之西北西南二鄉各圖里應徵七年未

完秋成併徵地漕河工銀兩及七年採辦漕價均  
一併緩至本年秋後啟徵以紓民力該部知道欽  
此

附奏拿獲積盜請加鼓勵摺片

再署婁縣典史試用從九品舒春元老幹勇健  
善於緝捕前因訪有積盜顧六卽顧阿六黨羽  
頗多在江浙接壤一帶恣行盜竊經松江府知  
府李景嶧遴委該員改裝易服緝至浙江嘉興  
地方將顧六擒獲解回審辦當經臣彙案附

奏奉

硃批所辦甚屬可嘉欽此隨經究出該犯先曾犯竊  
擬絞減軍發配脫逃後又糾劫江蘇婁縣事主  
錢吳氏家一案迭竊浙江秀水等縣事主王春

輝等家九案將顧六照例擬以斬決聲明法所  
難宥恭疏具

題在案查匪犯顧六出沒江浙兩省疊次盜劫實  
爲積惡巨魁該從九品舒春元以未經補缺之  
微員于奉委後不分畛域隔省踴緝俾得就擒  
伏辜以靖地方洵屬緝捕勤能相應請

旨將試用從九品舒春元遇缺儘先補用以示鼓勵  
出自

恩施伏乞

聖鑒訓示謹

奏

道光八年四月初八日具

奏五月十一日奉到

硃批另有旨欽此又同日奉到道光八年四月二十四日內閣奉

上諭陶澍奏拏獲疊刦巨盜之員請予鼓勵等語署婁縣典史從九品舒春元前經該府飭委卽改裝易服隔省緝獲疊刦巨盜顧六一犯照例辦理緝捕尙屬勤能着准其遇有從九品缺出儘先補用該部知道欽此

蘇省派辦布疋逾額懇請酌減摺子

奏爲蘇省連年添派布疋逾於舊額過多商力疲乏難以尅期領辦據情懇請酌減數目明定限制以節經費而卹商力仰祈

聖鑒事准戶部咨緞疋庫付稱江蘇省額解道光八年分五色三梭布五千疋現在各工並頒賞需用甚多應添派三梭布六萬疋又應添派本色油墩布六萬疋限十年四月內解庫如敢玩延立即奏參等因當經行司轉飭添辦去後旋據布商汪益美等呈稱布差一項自乾隆四十四

年以來祇有額辦五千疋間有不辦之年近來  
逐漸加添差多費重以致各舖爲賠貼倒歇十  
不剩一現存二十一戶復經報歇十三戶紛紛  
改業此後僅剩數戶力盡難支現在七年分差  
布數至二十萬五千疋今又奉部派辦八年分  
布十二萬五千之多數戶身家捐軀難報懇請  
減免明定章程以免悞差而保舖業等情當經  
批令蘇州藩司確察商力情形妥議催辦去後  
茲據該藩司梁章鉅轉據蘇州府督同吳縣詳  
稱查布差向額之外間有添派溯查嘉慶二十

五年以前惟十一年及二十年派辦至十一萬餘疋爲數較多其餘每年或一二萬疋至多不過六七萬疋從前原有布商四十五戶挨次承辦數年輪值一次尙易領辦近年舖戶接踵退歇不敷輪值所有道光六年各項布十八萬九千餘疋甫據該商等承領尙未辦解又有派辦七年分布二十萬五千疋先經咨部請減或分年辦解接准部覆七年分布疋不能酌減准展限于九年春秋二季解齊等因屢經飭催尙未據各商領辦今復奉咨派辦道光八年分布十



二萬五千疋限十年四月解庫通計兩年零四個月之內共需辦解布疋五十餘萬商力實屬不支前據各商紛紛具稟或請增例價或請移產地接辦均屬窒礙難行迭經駁斥惟查三梭布每疋例價銀三錢零油墩布每疋例價銀四錢零三線布每疋例價銀六錢棉布每疋例價銀五錢均係從前部編及乾隆年間所定迄今生齒日繁物力維艱日形昂貴應領例價本屬不敷其解運費用一切例無開銷添布愈多貽愈重從前派辦無多尙不能依限辦解今商

力已疲節次加添萬難尅期領辦况就例價計算七八兩年辦布三十三萬疋應給銀十三萬五千餘兩似此遞年加增恐非所以重

帑項更恐市價擡高爲閩閩之累不得不量爲籌計應請將七八兩年派辦布疋

奏請核減數目並請嗣後明立限制俾得按期催辦等情前來臣查派辦布疋係供

欽工及

頒賞各項應用不能以商力難支概從節省第思應用各項例有定數似不至今昔懸殊歲增數倍

若採辦過多陳積相因仍須估變徒勞商力況  
商力實已疲乏現在六年分派辦布疋十八萬  
九千有餘甫經領價尙未辦齊而七年八年分  
又復派辦至三十三萬疋之多在

國家經費有常遞年添辦例價已屬不貲况添數  
無定逐歲有加商情畏縮必至紛紛退歇辦理  
殊形掣肘蘇松財賦較重民間多藉布棉之利  
易銀完納錢糧若布舖關歇過多商賈不前實  
於地方生計攸關兼恐商情重利或因賠貼而  
擡增布值更屬貽累小民

臣

與藩司再四籌酌

現在五年分布正甫經解庫六年分布正正在督催趕辦足資接濟仰懇

天恩飭將道光七年八年派辦各布三十三萬正酌減數目俾現存各商得以儘力辦解再從前額解布正原止梭布五千迨後各項布正均須採辦漸次加添以嘉慶十一年二十年派辦至十一萬餘正爲最多然十五年卽全行停辦二十一二年均止辦布一萬正前後牽算仍不過每年四五萬正其餘各年派辦二三萬至六七萬正不等似稍從節省無慮不敷應請

旨敕下戶部查照嘉慶二十四年以前歷年舊則酌  
中定數遇有添辦每年總以若干爲度庶經費  
出納有準以節

帑項而紓商力兼便民情應解差布亦不至遲悞  
矣謹據情繕摺具

奏伏乞

皇上聖鑒訓示謹

奏

道光八年五月二十九日具

奏六月二十九日奉到

硃批該部議奏欽此

戶部爲遵

旨議奏事內閣抄出江蘇巡撫陶澍奏連年添派布疋逾於舊額過多商力疲乏難以尅期領辦請酌減數目明定限制一摺於道光八年六月十四日奉

硃批該部議奏欽此查原奏內稱准戶部咨緞疋庫付稱江蘇省額解道光八年分三梭布云臣等伏查緞疋庫存貯布疋係預備

盛京

三陵及

壇

廟工程並各項

賞需一切之用嘉慶十四年間

欽派大學士六部尚書會議奏定庫貯章程緞綢布疋等項多則暫停解辦少則先期行文製備總以所存足敷三年之用為度十五年間因庫貯江蘇省各項布共八十餘萬疋支放有餘暫停派辦以後每年雖經派辦為數較減並有停辦之年以致庫貯逐漸減少兼以該省不能按限交

納往往逾至半年自道光二年後竟遲至二三年始行交庫當時各處支領不敷放給經臣部屢催未解道光七年間經

盛京將軍晉昌等因吉林三姓所屬外夷每年貢納貂皮例給三梭布一萬九千餘疋未經放給奏准動項採買奉

旨著戶部及管理三庫大臣嚴催趕辦按照年例應給數目先期發給等因欽此當卽行催該省始將四年分布疋解到支放仍屬不敷是以六年分至八年分布疋先期行令多爲備辦除額解三



梭布棉布共三萬餘疋外添派十二萬至十四萬疋不等惟七年分多添三線布六萬疋溯查嘉慶十四五年庫貯均有八十餘萬疋今所存不及從前之半而支領比前加增卽如嘉慶十一二三等年每年用棉布三千餘疋今則支放八九千疋油墩布三梭布每年各用二三萬至四萬餘疋不等今則支放各四五萬疋用數多寡相殊派辦難以仿照況六七八等年應解布疋均各展遲兩年已較原限寬緩今該撫以商力疲乏未能尅期領辦請將七八兩年布疋酌

減數目並明定限制臣等公同核議以近年派辦布疋係照舊定章程以足敷三年之用爲度現在庫貯實屬不敷勢難酌減惟據該撫奏稱商情退縮辦理掣肘恐該商等藉此擡高價值貽累小民不可不預爲慮及臣等再四熟籌惟有前派四項布疋酌分緩急俾得從容辦理查現在庫存三梭布八萬餘疋每年約用四五萬疋例應三年庫貯今核計不敷二年支放油墩布現存四萬餘疋僅敷本年支放所有七八兩年分派辦此二項布疋斷難議減應令按照前

限如數解庫毋得再遲其六年分派辦布正據該撫奏稱業經發價領辦應令照前展期限於本年一併解交以備支放至三線布棉布二項庫貯尙可敷用酌擬暫停解辦將七八兩年分額解江南棉布緩至道光十年俟汕墩布三梭布解齊後於十一年起按春秋二季分批解交其七年分添派三線布六萬疋緩至十一年俟江南棉布解齊後屆期核計存貯多寡倘不敷用再行知該撫於十二年起按春秋二季解交如足數應用仍卽停止以卹商力再向來支放

各項布疋均由緞疋庫查照各處印領之數發給現查近年支領數目較嘉慶年間間有加增其因何增多之處應行知各該處自行查明有可撙節者酌量減省庶將來添派少減領辦從容於庫貯商力兩有裨益矣所有臣等核議緣由理合恭摺具

奏是否有當伏乞

皇上聖鑒

訓示施行謹

奏

四庫全書  
卷之三十一  
五  
道光八年七月初八日奏本日奉

旨向來緞疋庫支放布疋均係查照各處印領之數發給現據長齡等查明近年支領數目較嘉慶年間間有加增著緞疋庫行知各該處詳查歷屆支領數目將近年因何增多之處據實登覆由管理三庫大臣彙齊具奏再降諭旨餘依議欽此

又奉

上諭前因長齡等奏近年各處向緞疋庫支領布疋爲數加增降旨令將因何增多之處查明各該處由管理三庫大臣彙齊具奏茲據奏稱各處近年

支領布疋因逢典禮備賞需用較多尙非漫無限  
制至庫中向憑印領給發無從核減等語緞疋庫  
備用布疋各該處每年所領自應按例核實咨取  
豈得稍有浮濫嗣後著禮部工部太常寺光祿寺  
欽天監理藩院內務府等衙門嚴飭該司員等務  
當於咨取時將何項布疋若干疋係屬何例案咨取  
何項布疋若干疋係於例外增添詳細聲明以便稽  
核併著戶部及該管大臣等督飭司員等嚴行稽  
查移咨查庫御史及稽查三庫之江南道御史逐  
件核明毋許浮費再庫中存貯布疋例應預備三

年之用何項不敷支放卽應照例派辦不得通融  
抵補致滋弊端鑿儀衛承造駕衣裏布向例以山  
東布給發前因庫存短少以江南布核用現在江  
蘇商力竭蹶若仍以此項抵用未免偏枯著責成  
該司員等隨時稽察如山東河南等省至盛京應  
領三梭布係屬備賞納貂皮人等之需上年所領  
較嘉慶年間咨取至多之年增定二千疋該撫每  
年所進貂皮是否增多著該將軍將上年請領本  
年備用三梭布因何較前處加增確切查覆再行  
辦理欽此

恭謝

御賞藥錠摺子

奏爲恭謝

天恩仰祈

聖鑒事項臣摺弁回蘇奉到

御賞藥錠一匣謹卽恭設香案望

闕叩頭祇領欽惟

皇上甄埏六合

亭育九垓色潤珠囊正

北闕獻功之際和調玉燭奏南薰解愠之歌起瘡



瘼於象譯鞮胥

皇仁一視蠲逋累於通都禪邑

聖澤覃敷歡情孚勿藥之占

帝念軫如傷之隱節逢地臘

貺賚天珍聞

壽寓以萼英八瓊瓊液轉

洪鈞而鍊冶九轉還丹

賜出天衢潤浥金莖之露擎來江國香分寶鼎之煙

臣情切依蒲職慚蓄艾屢拜

榮恩於

日下重

頌靈劑於天中綵縷縈時映吳絲而煥色砂團捧處  
懷粒食以殷心爰分

愷澤於羣寮用警恫瘝於子庶物無夭札疵癘仰慰  
一人保赤之忱書成康樂安平敬伸百爾披丹之悻

所有臣感激忭幸下忱謹繕摺恭謝

天恩伏乞

皇上聖鑒謹

奏

道光八年五月二十九日具

奏六月二十九日奉到

硃批覽欽此

奏報三次清查案內追補銀數並逾限未完摺  
子

奏爲追補江蘇省三次清查案內虧墊銀數並將  
逾限未完之員遵照章程辦理仰祈

聖鑒事竊照江寧蘇州兩藩司所屬三次清查追補  
各款部議章程每年截數

奏報一次所有道光六年二限追補銀數業經

臣

奏明在案茲屆道光七年查辦三限完欠之期又  
經飭令兩藩司依限造報去後今據江寧藩司  
賀長齡蘇州藩司梁章鉅將追完銀數及已未

逾限員名造冊詳請具

奏前來

臣

查上屆二限

奏報江淮各屬尙有未補銀一百一十一萬三千七百一十五兩零蘇松等屬未補銀一百萬三千六百七十七兩零米一千七百四十六石零茲查該司等冊報三限截數江淮等屬共追補銀二萬三千五百五十二兩零蘇松等屬共追補銀一十萬一千四百三十一兩零米一千四百八石零現據飭令歸補原缺年款其未完各員除先已查叅摘頂撤任革職監追應俟統限

屆滿再行核辦外查有候補知縣甄別降補縣丞府經歷武念祖應完上元六合兩任內二限官欠銀兩現已逾限尙未完繳應請查照章程摘去頂戴停其委補俟完繳後再行開復又候補知縣甄別降補縣丞府經歷周履福應完鹽城任內官欠現在已逾統限應請革職監追查封寓所貲財及原籍家產備抵該二員尙有欠繳二限追賠銀兩亦經逾限應俟統限屆滿無完另行查照章程辦理此外各屬領變流難民役欠各款尙未全清仍飭趕緊催追完款再酌

提江蘇兩屬羨餘彌補無著銀兩前於遇災之年分別提免案內奏准部議行令於奏報單內分別展提若干提補若干劃清數目詳細開列等因除蘇州藩司所屬應提銀兩業經按年清解外所有江寧藩司所屬上屆道光五年未完銀三千二百兩零現仍未完又道光六年未完銀五千六百六十八兩零已催完銀八百八十八兩零仍未完銀四千七百七十九兩零又道光七年應解銀二萬三千三百兩除催完銀一萬一千二兩零仍未完銀一萬二千二百九十

七兩零現在嚴行勒追所有江蘇省三次清查  
案內三限追補銀數并逾限未完之員遵照章  
程辦理緣由謹會同大學士兩江總督臣蔣攸  
銛合詞恭摺具

奏伏乞

皇上聖鑒謹

奏

道光八年五月二十九日具

奏六月二十九日奉到

硃批戶部知道欽此



審明控爭灘地歸營並另行查辦召變新淤摺  
子

奏爲遵

旨審明定議仰祈

聖鑒事竊照海州職員孫景韶等遣抱王堂以恃營  
侵占銀地兩空等詞赴都察院具控奏奉

諭旨此案著交張師誠親提人証卷宗秉公審訊按  
律定擬具奏抱告王堂該部照例解往備質欽此

前撫臣張師誠遵卽行司飭委署徐州府馮馨

前往會勘旋卽調任卸事臣到任後催據孫景

韶等以該處窪地水積難以施丈由州請咨展  
限並據委員馮馨稟司詳咨嗣據該原告及葦  
左營弁各以盜割柴薪互稟飭州督收公貯孫  
景韶等復遣抱赴都察院具控咨回審辦經臣

嚴催飭查據前任淮海道羅琦以孫景韶等控  
爭灘地有礙官蕩關係河防稟請退還原價將  
地歸營留爲日後產柴以備南河工用等情當  
經批司查議移據現任淮海道沈惇夔仍以前  
情稟覆行提人卷來省委據署蘇州府知府李  
景嶧審議由臬司行慶詳解前來臣親提研鞫

緣孫景韶籍隸海州該州及安東阜寧二縣有  
新淤海灘與葦左營產柴宮蕩毘連嘉慶二十  
一年間淤灘召變陞科孫景韶孫聖傳馬際昌  
在海州報買灣大等港下則新淤八百六十六  
頃零共繳價銀八千六百六十餘兩領照執業  
嗣因淤受滷氣鹹性復生毫無出息由州詳經  
奏明停賦孫景韶等以地與官蕩界址不清呈州  
勘丈劃界當據該守備孔傳均以該處係屬營  
地並非淤灘互相稟控道光三年間經前督臣  
孫玉庭飭委前護淮海道王貽象督同州營丈

明孫景韶等承買新淤飭令管業孫景韶等心  
不輸服卽以營佔等情遣抱京控奏奉

諭旨交審查提人証來省屢訊供悉前情臣以葦營  
官蕩生長柴薪以濟工需正以節省

國帑其濱海新淤黃流漫過沙積生灘日久卽成  
蕩地若歸之於營則產柴更廣工料愈充實於  
河防大有裨益從前未經通盤籌畫故有召變  
歸民之舉令孫景韶等復於承買後藉控圖佔  
若仍照原案斷給恐將來沿海生生不已之灘  
盡成民業轉使官蕩圍處腹中日漸淤高致變

不毛之地官蕩產柴既少勢必購自民間昂價  
居奇於

帑項河工殊有關係溯查嘉慶二十二年間右營  
召變地內查有沿海地一千四百餘項與蕩地  
有礙不可歸民應仍歸葦營管理奏奉

諭旨准行在案此地事同一律自應退還歸營以備異  
日公用當向孫景韶等逐層曉諭孫景韶等無  
可置詞各願退地領價照斷完案應請將孫景  
韶等前買新淤共八百六十六項零盡行退出  
歸公仍撥還原價給領追照塗銷其所稟互割

柴薪一節審明並無其事應與訊未佔地之各  
營弁均免置議至原丈召變新淤除孫景韶等  
承買灘地之外尙有間雜灘租老糧地並周殿  
華等價買地九百餘項應否一體歸公仍飭州  
勘明另行查辦以杜爭端除供招咨部查核外  
合將審議緣由恭摺具

奏伏乞

皇上聖鑒訓示謹

奏

道光八年六月二十日具

奏七月二十三日奉到

硃批另有旨欽此

道光八年八月二十二日准

刑部咨內閣鈔出江蘇巡撫陶 奏海州職員

孫景韶等遺抱王堂以恃營侵佔銀地兩空等

情一摺道光八年七月初八日奉

上諭陶澍奏審明控爭灘地一摺此案孫景韶等前  
在海州報買灣大等港下則新淤地畝該地與官  
蕩毗連屢經爭控查勘茲據該撫查明葦營官蕩  
生長柴薪有裨工用若召變歸民轉恐工料昂貴

請照案退地歸營所有孫景韶等前買新淤共八百六十六頃零著卽盡行退出歸公撥還原價給領追照塗銷至原先召變新淤尙有間雜灘租老糧地並周殿華等價買共地九百餘頃該撫卽飭令勘明辦理餘照所議完結該部知道欽此



請酌減各州縣提解羨餘彌補舊虧銀兩摺子  
奏爲三次清查案內提補銀兩體察各屬情形懇  
請每年酌減提解仰祈

聖鑒事竊照江蘇省三次清查開報無著銀兩前撫

臣韓文綺奏經戶部議覆江淮等屬每年酌提

羨餘銀二萬三千三百兩蘇松等屬每年酌提

羨餘銀六萬兩均限八年彌補清楚嗣因被災

之年州縣羨餘無出不能一律派提復經臣于

上年奏准部覆展限提解在案茲屆本年上忙

應提各屬羨餘之期卽經臣分飭江蘇兩藩司

催提完解去後據江寧藩司賀長齡蘇州藩司  
梁章鉅會詳稱各屬派提羨餘彌補無著原係  
酌盈劑虛自當踴躍完解乃自道光五年以至  
七年按限催提非完繳不前卽頻年短欠初謂  
各牧令視非本任所虧有心觀望及詳加體察  
委實力有不支蓋羨餘出自錢漕該州縣一切  
辦公之需全賴此項取給本不能多有贏餘從  
前年穀豐稔百姓輸將踴躍或尙可冀節省而  
州縣祇有此項補於彼者必絀於此已不免挪  
移掩飾故二次清查彌補之後甫閱十年而三

次清查又有續虧銀二百六十餘萬兩卽其明  
證近則更非昔比溯自道光三年大水而蘇松  
太倉之民困道光四年洪湖潰溢而淮揚之民  
困道光六年昭關減黃各壩相繼疊開水勢四  
浸而淮海揚徐之民又復大困卽其間偶有一  
二中稔之年熟少歉多元氣未能遽復拖欠課  
賦比比皆然蠲免緩徵歲所常有實徵之錢漕  
較前旣絀應得之羨餘卽更無多而年例公事  
如挑河木植銅鉛餉鞘一切費用均因物力艱  
難倍昂於昔再加派提限補以其所入計其所

出實有不敷故催提雖緊而完解不前請將江蘇各屬歲提羨餘酌減提解詳請具

奏前來臣查三次清查案內歲提羨餘銀兩彌補各屬舊虧原係酌盈劑虛惟力自視江藩司所屬開報無著舊虧銀一十七萬六千餘兩每年應提羨餘銀二萬三千三百兩除已經提補外核計尙有未補銀一十四萬一千三百餘兩蘇藩司所屬原報無著舊虧銀四十二萬九千餘兩每年應提銀六萬兩除已經提補外尙有未補銀二十四萬九千七百餘兩爲數均尙不少

當此連年積歉之餘元氣未復民困而官亦困  
不有以紓州縣之力勢必有提無解及至事迫  
情窘則或峻法以催科或挪款以應急苟救目  
前何弊不至夫以後任而代補前虧且又責以  
力所不及事本未爲平允法卽有所難加卽使  
執法嚴叅而閭閻之波累已深地方之元氣愈  
損因末傷本非計之得臣與兩藩司反覆籌商  
從長計議今昔情形既有不同與其尅期提補  
徒滋弊端莫若減數緩提較有實濟寬州縣卽  
所以軫民生寬百姓正所以裕

國計事屬相因庶無流弊合無仰懇

皇上天恩俯准將江蘇兩屬歲提羨餘自道光八年  
爲始均按原數酌提三分之一江藩司所屬每  
年提補銀七千七百六十六兩零蘇藩司所屬  
每年提補銀二萬兩如遇大災之年仍照奏定  
章程准其展限提解如此量爲寬展於清查庫  
款仍屬照常彌補而於

國計民生地方吏治均有裨益臣與大學士兩江

總督臣蔣攸銛往返札商所見相同謹合詞恭

摺具

奏伏乞

皇上聖鑒

訓示施行謹

奏

道光八年六月二十九日具

奏八月初三日奉到

硃批另有旨欽此同日奉到道光八年七月十六日

內閣奉

上諭陶澍奏三次清查案內提補銀兩請每年酌減  
提解一摺江蘇省三次清查案內無著銀兩前經

議定章程每年酌提羨餘彌補嗣因被災之年州縣羨餘無出不能一律派提經該撫奏明准其展限提解茲屆應行提補之期據該撫查明江寧藩司所屬每年應提羨餘銀二萬三千三百兩蘇州藩司所屬每年應提羨餘銀六萬兩適當連年積歉之後元氣未復拖欠尙多蠲緩歲所常有與其尅期提補徒滋弊端莫若減數緩提較有實濟著照所請准其自道光八年爲始按照原數酌提三分之一江寧藩司所屬每年提補銀七千七百六十六兩零蘇州藩司所屬每年提補銀二萬兩如



遇極歉之年仍照奏定章程准其展限提解該部  
知道欽此

奏報監臨闈務起程摺子

奏爲恭報起程辦理監臨事務仰祈

聖鑒事竊照本年戊子科江南鄉試輪應安徽巡撫

監臨闈務臣接准部咨安徽撫臣鄧廷楨因籍

隸江寧省城奏奉

諭旨著

臣

入闈監臨欽此當卽欽遵轉行司道將應

辦一切事宜趕緊分別詳辦去後惟查場前會

考內外簾員及優行生員應須先期前往臣現

將緊要案件趕緊清理於七月二十日自蘇州

起程前往江寧遵照章程督率提調各員詳慎

辦理臣衙門日行事件循照向例委蘇州藩司  
梁章鉅代拆代行臬司招解命盜案件亦委藩  
司代勘發回以免積壓仍由臣分別

題咨此外如有緊要事件仍令包封送至行署核  
辦所有臣起程辦理關務緣由理合恭摺具

奏伏乞

皇上聖鑒謹

奏

道光八年七月二十二日具

奏八月二十七日奉到

殊批知道了欽此

附奏淮揚河湖盛漲摺片

再本年洪澤湖運河一帶水勢長發既早雨水復多較前數年盛漲尤高接據淮揚道鄒錫淳稟稱淮水迭長因下河田禾未收三河雖放而兩壩未敢卽啟迨水至一丈七尺二寸始放智壩其信壩及高郵四壩仍在堅守詎洪湖之水有長無消至六月杪已長至一丈八尺二寸堰盱石工入水甚多七月初六日忽起西北風暴大雨如注湖浪直潑過堤石埽各工掣塌甚多情形危險當卽啟放信壩洩水高郵河湖七月

初七日誌椿已長至一丈四尺四寸久逾放水  
定則而初六日風暴揚河臨湖西堤節節掣通  
高郵州城上下河湖一片茫無津涯東堤又僅  
出水一尺餘寸至二尺餘寸不等今再添此信  
壩之水恐難容納現將車邏壩於七月初八日  
開放過水南關壩中壩亦卽次第拆啟以資宣  
洩而防漲漫等情臣查各壩既開高郵及下游  
各屬田禾不免淹浸恐民居亦多被水卽經札  
飭揚州府知府黃在厚速赴各屬查勘設法疏  
消星飛稟報臣因場期迫近不克分身現在督

臣赴浦防河親往察看如有應行撫卹之處另行籌商辦理務俾妥協仰副

宸廑謹附片以

聞伏乞

聖鑒謹

奏

道光八年七月二十二日附

奏八月二十七日奉到

硃批另有旨欽此

道光八年八月二十一日准

兩江總督蔣 咨道光八年八月十七日准

兵部火票遞到

軍機大臣字寄

大學士兩江總督蔣 道光八年八月初十日

奉

上諭據陶澍奏本年湖水盛漲啟放三河及智信兩壩後揚河臨湖西隄節節掣通東堤僅出水一尺餘寸至二尺餘寸不等現將車邏壩南關壩中壩尖第啟放以資宣放開壩後高郵及下游各屬田禾不免淹浸恐民居亦多被水已飭揚州府速赴



查勘設法疏消等語高郵河湖長水久逾定期前  
據張井等奏因高郵及下游各屬田禾芄茂各壩  
遲開數日即可收穫現於七月初八日開放車邏  
壩後南關壩中壩亦次第啟放高郵及下游各屬  
田禾是否已經刈穫抑竟被淹浸該督現赴清江  
浦防河當可就便親往察看如有應行撫卹之處  
著卽籌商妥辦勿令被水居民一夫失所至現在  
洪澤湖水漲盛堰盱石工情形危險雖經該河督  
等督飭所屬保護平穩而秋汛正長必須加意防  
範此時黃河水勢消長若何如能卽啟禦壩不但

黃水資其刷滌而湖水大加減洩堰盱石工亦不致有他虞卽日回空船隻陸續南下斷不可令其日久守候著蔣攸銛與張井潘錫恩察看情形迅將禦黃壩拆啟俾糧艘及早歸次河湖各工亦可兼資其益也將此諭知蔣攸銛並諭張井潘錫恩知之欽此遵

旨寄信前來

附奏陳請

陛見摺片

再臣自道光五年六月由安徽巡撫蒙

恩調任江蘇扣至本年六月三年期滿例得入覲  
矢顏藉伸犬馬瞻戀之忱適奉

諭旨派臣監臨秋闈未敢冒昧瀆請一俟場後謹當  
具摺籲請

陛見合并附片陳明伏乞

聖鑒謹

奏

道光八年七月二十二日附

奏八月二十七日奉到

硃批毋庸前來明歲秋間再行奏請欽此

新漲沙洲酌議入官充公以杜爭競摺子

奏爲遵

旨確查新漲沙洲酌議入官充公以杜爭競恭摺覆

奏仰祈

聖鑒事竊臣承准軍機大臣字寄欽奉

上諭御史蔣泰階奏通州崇明一帶沙地偶然漲出  
多爲土豪霸佔近因爭地釀釁訟案紛起請飭各  
州縣勘明此等沙灘無庸紛紛查辦等語此項沙  
地坍漲靡常沙棍乘機霸佔恃強逞兇屢釀巨案  
最爲該省惡習著陶澍體察該處情形應如何息

爭杜訟之處據實奏聞等因欽此當卽恭錄轉行  
查議並因沿江沿海各屬皆有沙洲自應通查  
明確一併

奏辦又經專札飭查去後茲據各屬陸續覆齊由

江寧蘇州兩藩司具詳前來臣查江南沙洲地

畝價少課輕獲利甚厚是以一沙初漲羣起相

爭每釀械鬪巨案前於嘉慶十七年間經前督

臣百齡等

奏准將坍沒之地不願豁除者報案留糧遇有新

漲子母相連准其按數撥補如係江心突漲概

行由官召變分別繳價先後以定准駁本爲杜

爭起見乃法之所在弊卽叢生

臣

詳加體察現

惟崇明一縣有沙無田歲徵沙課向有常額漲

旣不陞坍亦不豁統歸三年大丈於原額課內

攤增攤減由來已久祇須於屆丈之年從公攤

撥尙不難於杜覺外其餘有洲各屬則皆積慣

沙棍恃有留糧待補或因該洲將漲卽先捏報

被坍預爲冒陞地步或向被坍之戶私買坍糧

爲爭訟地步一遇新漲沙洲卽糾誘散戶以得

地均分歛錢興訟非以甲地之相連捏爲乙地

之接漲卽以此號之舊額指爲彼號之復生分  
投具呈各報各案其無可影射者則又以突漲  
爭買沙未出水卽已望影報陞百計譸張紛歧  
錯出甚至恃強爭鬪動輒傷斃多人積衅成仇  
愈難解釋而棍蠹慾壑無窮猶且多方唆弄或  
抗不具結或已結復翻或捏情京控案一日不  
能結彼仍獲一日斂錢之利而小民貲本已空  
欲罷不能未獲沙地之利轉受沙地之累此則  
沙棍爲害而自留糧待撥又因法致弊之實在  
情形也竊思截流必先清源源之不清雖方截



其流而不止民之趨利如水就下而狡黠沙棍  
則更變幻多端卽再別設科條恐一法立而一  
弊又生仍屬有名無實伏查丹徒縣之樂生洲  
自入官收租作爲歲挑徒陽運河之費迄今數  
十年官佃相安此外沿江沿海控爭沙地一經  
歸公訟端卽息推原其故地旣歸公豪強無可  
覬覦而窮民奉官承種無所用其機謀卽亦不  
爲洲棍所惑則欲求永息爭端莫如遇有新洲  
漲生一概歸公爲善若謂自然之利應以利民  
則今之沙洲不但窮苦編氓斷不能得卽稍有

力之善良一被勾誘輒至傾家若復因奪而關  
身命且多不保是徒有利於棍蠹而實無益於  
良民則以之充公正所以息爭安良且洲仍民  
佃並非與民爭利而受佃於官與受佃於豪強  
其租息之輕重亦殊於窮苦編氓更爲得濟況  
地方遇有例外應辦之事恒以費無所出每致  
束手大江南北地廣政繁應辦事宜更復不少  
舉其大者言之夫東南爲財賦所出全賴水利  
爲功現在各屬河道湮塞旱澇無備一遇災歉  
公私傷損上年雖將吳淞江

奏請疏濬而瀏河白茆孟瀆諸鉅流尙以經費難  
籌致稽挑辦卽徒陽運河亦多賠累如練湖等  
處卽未能修治若淮揚所屬河道固應河工鹽  
務修理間亦有須地方籌辦者徐海兩屬並有  
東省豫省下注之水一遇雨澤稍多輒成澇歉  
實屬目前至急之務

國家經費有常旣未便頻頻請

帑若責之州縣又力有難能任其湮廢則民困而  
賦稅亦無所出今幸有此自然漲出之沙地如  
以之撥充公用作爲水利津貼縱不能大舉一

修亦可以擇要辦理逐漸成功既無損於

國計實有利於民生堪以一舉兩得臣悉心酌議

應請將崇明一縣仍循其舊外其餘各屬嗣後

凡有坍沒沙洲均令地方官隨時勘明實在被

坍頃畝卽將課賦詳咨豁除不准留糧待撥如

有新漲洲地無論子母相生江心突漲一概歸

公責成洲總隨時呈報由官勘明按則詳定課

賦其洲地卽召佃承種歲收租息按數批解藩

庫除扣完課賦外餘爲地方水利之用遇有應

辦由藩司確勘地方緩急情形詳明酌放辦理

至民間買洲例應繳價泥草等灘每畝價止一  
二錢卽高阜堪以圍田之洲價亦不過二兩爲  
數甚微今旣入官若令佃戶繳錢作價或又視  
同已業設有承種不妥礙難退佃竊以地旣歸  
公卽屬官產應請免繳例價而租旣留充公用  
地仍完納

國課所益尤多如蒙

俞允現在評訟未結各案卽照此一例歸公毋庸紛  
紛查辦所有從前報冊留糧待撥已經咨准部  
覆尙未撥補之案各業戶旣經賠課有年仍飭

各屬俟有新漲洲地果係原冊處所相連俟出水後照案詳請撥補以示格外體卹倘有狡執卽將洲地歸公所賠之課照數發還由洲地租內分年取息彌補俾免糾纏至此項新漲歸公洲地其頃畝陞冊數目均照民洲之例歸於大丈案內造報其應納課銀亦歸每年奏銷案內造報所有常年收支租息數目隨時酌量辦公不能一例應請免其報銷仍由藩司確查彙報督撫衙門查核備案以昭核實所有遵

旨查議新漲洲地歸公杜訟緣由是否有當理合恭

摺覆

奏伏乞

皇上聖鑒訓示謹

奏

道光八年八月三十日具

奏十月初四日奉到

硃批該部議奏欽此

戶部謹

奏爲遵

旨議奏事內閣抄出江蘇巡撫陶澍查明江南各屬  
新漲地畝請一律歸公徵租一摺道光八年九  
月十六日奉

硃批戶部議奏欽此欽遵於九月二十日抄出到部  
據原奏內稱承准軍機大臣字寄欽奉

上諭御史蔣泰階奏崇明一帶沙地偶然漲出多爲  
土豪霸佔近因爭地釀衅訟案紛起請飭各州縣  
勘明此等沙灘毋庸紛紛查辦等語此項沙地坍



漲靡常沙棍乘機霸佔恃強逞兇屢釀巨案最爲  
該省惡習著陶澍體察該處情形應如何息爭杜  
訟之處據實奏聞等因欽此當卽恭錄轉行查議  
並因沿江沿海各屬皆有沙洲自應通查明確  
一併奏辦等語臣等查江南省瀕臨江海沙地  
例載坍塌業戶不願豁糧者繪圖註冊遇有新  
漲果係子母相連方准撥補撥補所餘及另漲  
餘沙儘數入官召變若捏報子母相連或冒稱  
原坍復漲及私行霸佔者淤洲入官仍照律治  
罪定例綦嚴乃法久弊生或捏報被坍爲冒補

地步或私買坍糧爲爭訟張本其無可影射者則沙未出水已望影報陞希圖呈買故江南爭控沙洲往往釀成巨案況此項沙地多由沙棍漁利陡築成洲若不杜絕爭端亦恐有妨水道本年御史蔣泰階條奏河灘案內欽奉

諭旨著陶澍體察該處情形應如何息爭杜訟之處據實奏聞等因由軍機處欽遵字寄該撫查辦茲據該撫臣陶澍查明崇明一縣有沙無田沙課歲有常額漲不報陞坍不豁賦請仍循其舊外其餘各屬議請凡遇沙洲坍沒均令地方官

隨時勘明詳咨豁賦不准留糧待補如有新漲  
洲地無論子母相生江心突漲一概歸公由官  
勘明按則定課洲地令佃承種免其繳價歲收  
租息批解藩庫除完課外餘為地方水利之用  
並聲明現在訐訟未結各案即照此一律歸公  
毋庸查辦等語查撥補召變既皆足以誨爭自  
不若一概歸公使漁利之徒無所施其伎倆而  
歲收租息藉資水利津貼較之估價召變所入  
又覺有常該撫所奏係援照丹徒縣樂生洲成  
案為杜訟濟公起見應請如所奏辦理嗣後遇

有接漲突漲沙地行令該撫臣卽飭查勘入官  
隨時定課議租專案咨部如有轉則陞科之處  
亦令照例隨時勘辦查報仍統於大文案內彙  
題應納課銀歸入每年奏銷造報惟此項租息  
旣經歸公卽同帑項遇有動用未便免其報銷  
致有佃欠官虧部中漫無稽核應令每年送一  
管收除在四柱清冊備查至從前報冊各戶旣  
准其留糧在先如有相連接漲自當准其撥補  
仍令速飭查明戶口畝數彙造簡明細冊送部  
以憑將來核對恭候

命下除行文該撫臣遵照外仍存俟修例時臣部纂  
入則例謹將核議緣由恭摺具

奏伏乞

皇上

訓示遵行謹

奏請

旨

道光八年十月十二日具奏本日奉

旨依議欽此